

Anwar pertahan kebebasan bersuara mahasiswa UMS

Oleh HASIF IDRIS
utusannews@mediamulia.com.my

PETALING JAYA: Datuk Seri Anwar Ibrahim tidak menyalahkan tindakan sekumpulan mahasiswa Universiti Malaysia Sabah (UMS) yang membakar karikatur menyerupai dirinya di Kota Kinabalu, Ahad lalu.

Sebagai bekas aktivis mahasiswa dan reformis, beliau akan sentiasa mempertahankan kebebasan bersuara seperti termaktub dalam Perlembagaan.

Katanya, insiden itu mengingatkan tentang betapa besar

harapan rakyat agar rasuah dibanteras sehingga ke akar umbi.

"Anwar sendiri muncul daripada gerakan mahasiswa dan pernah memimpin gerakan reformasi di jalanan. Beliau benar-benar memahami suara itu dan pernah menjadi saksi kritikan walau sepedas mana, adalah sebahagian penting dalam meraikan demokrasi.

"Beliau menitipkan pesan, semangat pembaharuan bermula dengan keberanian anak muda menyuarakan kebenaran berlandaskan fakta dan niat yang tulus.

"Di pihak kerajaan, komitmen reformasi kekal teguh, sedang dan telah diterjemahkan ke dalam tindakan nyata. Komitmen reformasi ini tidak akan terhenti setakat ini dan terus diperhalusi untuk dilaksanakan dengan berstruktur," katanya menerusi taklimat harian rasmi dalam platform media sosial, semalam.

Taklimat itu disampaikan oleh Setiausaha Akhbar Kanan Perdana Menteri, Tunku Nashrul Abaidah.

Ahad lalu, kumpulan aktivis pelajar, Suara Mahasiswa UMS

bertindak membakar karikatur mirip Anwar semasa perhimpunan Gempur Rasuah Sabah 2.0 di Kota Kinabalu.

Selaras pendekatan Kerajaan Madani yang mengutamakan nilai ihsan, Anwar turut mengarahkan Kementerian Pendidikan Tinggi (KPT) dan UMS agar tidak menyekat perjalanan akademik pelajar terlibat.

"Masa depan anak muda tidak harus terkorban dalam arus perbezaan pandangan.

"Demi generasi akan datang, Kerajaan Madani akan terus menapak di landasan reformasi

bagi memastikan setiap usaha memerangi rasuah diterjemah ke arah kesejahteraan dan kemakmuran buat seluruh rakyat," katanya.

Dalam perkembangan lain, Tunku Nashrul memaklumkan kesihatan Anwar berada dalam keadaan sangat baik selepas menjalani pemeriksaan kesihatan tahunan di Hospital Sultan Idris Shah, Serdang, Sabtu lalu.

"Alhamdulillah, tahap kesihatan beliau dalam keadaan sangat baik dan dapat meneruskan tugas rasmi seperti biasa," katanya.

UTUSAN MALAYSIA 25 JUN 2025

m/s: 6